

Declaración Universal di Dirētu di Hómé

Cu Assembleia Geral ploclamó ni resolución di 217 (III) di 10 di Dezemblo di 1948

Pleâmbulo

Punda dignidade di tudo nguê di mundu e dirētu d’inem igual e andeji cu a na pô bëndê fa sá stê di liberdade, di justiça e di paz ni mundu;

Punda fata di conheximentu e displêzu di dirētu di hómé plovocó atu di malvadez cu ca revoltá cunxença di tudo hómé di mundu e punda ua mundu cu tudo nguê ca pô sa livli, pê pô fló e pê pô quêlê ni cuá cuê mêssê, sê mendu e sê miséria, fô ploclamadu cuma cuá maxi importanti cu hómé inventá;

Punda ploteçón di dirētu di hómé baseado ni ua ligime di dirētu sá importante lumadu, pa hómé na sá obrigado utilizá, cuma ultimu recurso, livolta contla tirania e opressón;

Punda ê sá importante lumadu conselhá disenvolvimentu di amizade entre tudo téla;

Punda ni Cata, tudo pôvô di Naçón Unida ploclamó ôtlô vê, fé d’inen ni dirētu di hómé cu di muala e nen declará cuma nen sá lesovido melhorá ploglesso social pa tudo nguê tê milhó vida ni ua liberdade maxi nglandji;

Punda tudo Estado memblu xinó complomissu cuma nen ca ba plomovê, ni cooperaçón cu Organizaçón di Naçón Unida, lispêtu universal e efetivo di dirētu di hómé e di liberdade maxi importanti;

Punda ua mêma conceçón di nen dirētu cu liberdade sé sa importanti lumadu pa pô cumpli complomisso sé:

Assembleia Geral

Ca ploclamó Declaração Universal di Dirētu di Hómé sé cuma ua cuá buá pa tudo pôvô cu téla di mundu pô fé, pa tudo nguê cu tudo organizaçón di téla, pô na txilé ni cabeça fa, fé tudo cuá cu nen cá pôji, pó melhorá ensino cu educaçón, disenvolvê lispêtu di dirētu cu liberdade, tlabó pa pô concê e pa pô platicá tudo cuá sé ni tudo Estado memblu e ni téla cu naxi tê dependenxa fa.

Artigo 1º

Tudo nguê di mundu ca nancê livli e igual ni dignidade e ni dirētu. Punda nen ca pensó e nen tê cunxensa, seló nen fé tudo cuá cu tençón de lumón.

Artigo 2º

Tudo nguê ca pô flá ni dirētu cu liberdade cu sa ploclamadu ni Declaraçón sé, sê distinçón, mó fala di laça, di côlô, di sexo, di lingua, di religiôn, di pensamento político ô ôtlo, di natureza di téla ô di sociedade, di liqueza, di naximentu ô qualqué ôtlo situaçón.

Alén di cuá sé, a na ca pô fé nê ua separaçón baseado ni estatuto político, jurídico ô di téla di qualqué nguê, mêmu xi téla sé conquistá dependenxa zá ô xi ê naxi tê fa.

Artigo 3º

Tudo nguê tê dirētu di vida, di liberdade e di segurança pessoal.

Artigo 4º

Nê ua nguê ca pô vivê ni escravatura fa; escravatura cu bendê ô coplá escravo sá ploibido.

Artigo 5º

Nê ua nguê na ca pô sê tlatadu cu clueldade e sê cloçón fa.

Artigo 6º

Tudo nguê tê dirētu pa tlaté cu justiça ni tudo lugué

Artigo 7º

Tudo nguê sá igual pê cumpli lei di téla e seló lei sé plotêgê tudo nguê sê fé distinçón. Seló tudo nguê sá protegido sê distinçón contla qualqué cuá cu sá contla Declaraçón sé e contla tudo cuá cu cá plovocá mali sé.

Artigo 8º

Tudo nguê tê dirētu di lecolê ni stluviçu di téla dê, contla qualqué situaçón cu ca violá dirētu maxi importanti cu sá ni Constituiçón e ni lei.

Artigo 9º

Nê ua nguê na ca pô sá plesu fa e a na ca pô mandá ni ua nguê ba ôtlo téla sê motivo fa.

Artigo 10º

Tudo nguê tê mêmu dirētu ni tlibunal, cu tocá tlatá tudo cuá di nguê sé cu justiça, sê plijudiqué di qualqué modo.

Artigo 11º

Tudo nguê cu sá cusado di fé qualqué cuá sá nôcentxi antê cu a ca julgué publicamente ni tlibunal e seló a dé possibilidade pê pô défêndê ubuê dê contla cusaçón sé.

A na ca pô condená ua nguê fa, xi ni momento cuê fé mali, pena cu ca castigá mali sé na sá esclito ni livlu di justiça di telá dê ô ni livlu di justiça internacional. A na ca pô dé ua castigo maxi pesado fa, xi ni djá cuê fé mali, pena sé maxi pesado na tava sên fa.

Artigo 12º

A na ca pô incomodá sê motivo ua nguê ni vida dê fa, ni familia dê fa, ni ké dê fa, ni cata dê fa, e a na ca pô toqué ni honra nê reputaçón dê fa. Seló lei di telá dê protegê contla tudo mali sé.

Artigo 13º

Tudo nguê tê dirētu di ndá e coiê ké dê n’dentlu di téla dê.

Tudo nguê tê dirētu di xê di téla andji ê sá nê, di téla dê tudaxi, e ê tê dirētu di biló ba téla dê ola ê mêssê.

Artigo 14º

Tudo nguê cu sá plesseguido ni ua téla ê tê dirētu di ploculá ploteçón ni ôtlo téla, e ê sá obrigado pa dé ploteçón.

Maji dirētu sé na ca valê fa xi qualqué nguê cometê ua clime ô xi ê na lispetá tudo mandamento di Naçón Unida fa.

Artigo 15º

Tudo nguê tê dirētu di tê ua nacionalidade.

A na ca pô txiló ua nguê nacionalidade dê fa nê obligué mudá nacionalidade dê fa.

Artigo 16º

Tudo hómé cu muala tê dirētu di casá e di flomá familia, ola cu nen ca tê daji, sê piá laça, nacionalidade ô religiôn. Tudu nen tê mêmu dirētu, ola nen sá casadu e ola casá ca blagá.

A na ca pô obligá hómé cu muala casá fa.

Familia sá base di tudo sociedade e ê tê dirētu di ploteçón di sociedade e di Estado.

Artigo 17º

Tudu nguê, xi ê só êlê tan ô zuntadu cu ôtlo nguê, tê dirêtu di propriedade.

A na ca pô txilá sê motivo qualqué bén di ua nguê fa.

Artigo 18º

Tudu nguê tê dirêtu di pensamento, di cunxença e di religiôn; dirêtu sé ca implicá liberdade di mudá di religiôn ô di conviçôn, liberdade di manifestá religiôn ô conviçôn, ua nguê tan ô zuntado cu ôtlo nguê, publicamente ô non, ni tudu cuá di telá.

Artigo 19º

Tudu nguê tê dirêtu di liberdade di opiniôn e di flá. A na ca pô plijudicá nê ua nguê fa punda ê manifestá opiniôn dê e ê ca pô goló, lêcêbê e uangó , ni qualqué xitu cuê mêssê, tudu pensamentu dê, tudu ideia dê, modo cu ê mêssê.

Artigo 20º

Tudu nguê tê dirêtu di liberdade di reunião e di associaçón.

A na ca pô obrigá ne ua nguê di fé patxi de ua associaçón fá.

Artigo 21º

Tudu nguê tê dirêtu di participá ni tudu assunto di tela dê, ê pô sa êlê mé ô ê ca pô mandá ua nguê cuê mêssê.

Tudu nguê tê dirêtu di lutá ni tudu situaçón di estado di téla dê.

Vonté di povo só base de autoridade di podê di Estado, vonté sé ca manifestá ni elêçón livli e justu cu ca realizá cu data mlacado zó ni lei baseado ni voto secloto e cu tudu nguê tê liberdade di voto.

Artigo 22º

Tudu nguê, cuma ê só memblo di sociedade, ê tê dirêtu di tê segurança social. Andeji ê tê dirêtu di pidji pê gózá di dirêtu económico, social e cultural glaça a saclifiçu di tudu nguê di téla dê, e di coperaçón internacional.

Artigo 23º

Tudu nguê tê dirêtu di tlabá, di coiê tlabá cuê mêssê e di tudu ploteçon pa na txilé di sluviçu fa.

Tudu nguê sê discliminaçón cu cá fé ua casta di stluviçu, tudu nguê sé, tê ua migida di gêlo sé mé.

Tudu nguê cu ca tlabá selá ê lêcêbê gêlu cu ca dá pê vivê baleladu cu familia dê sê passá afliçón.

Tudu nguê cu mêssê, tê dirêtu di juntá glupu cu otlô nguê pá fundá sindicato di dêfendê interesse di glupo sé.

Artigo 24º.

Tudu nguê tê dirêtu di descanso, e gozá félia tudu anu, e óla cu é ca lentlá félia sé, selá patlón ô estado pagué vencimento.

Artigo 25º.

Tudu nguê tê dirêtu di tê vida baleladu pê pô gozá di saôji êlê cu familia dê, tê cumé, lôpa, ké, dôtôlô cu minjan. Ê tê dirêtu di segurança social, óla ê só sê stluviçu, ni duentxi, xi ê sôflê acidente, xi ê bilá vé ô n'ôtlô situaçón cu na ca dé meio pê pô vivê, contla vonté dê.

Maternidade cu mina piquina tê dirêtu di zuda cu assistêcia. Tudu mina piquina mêmu cu na só mina di hómé ô muala casadu fa, tê dirêtu di ploteçon social.

Artigo 26º.

Tudu nguê tê dirêtu di educaçón. Estado tocá pagá ensino básico da tudu nguê. Ensino básico só obrigatório. Ensino técnico cu profiissional tocá zisti ni tudu xitu e tudu nguê cu mêssê fé cursu superior selá déssé xi ê tê condiçón pê fê.

Selá educaçón contribui pa desenvolvimento di hómé, lefoçá dirêtu cu liberdade maxi importanti di hómé sé. Andeji ê tocá fé tudu cuá pa zisti complençón, tolerância cu amizade entre tudu naçón cu tudu laça ô religiôn, e desenvolvimento di tudu cuá cu Naçón Unida ca fé pa tudu nguê tê paz.

Tudu pé só ca coiê quê tipu de educaçón cu sa milhó pa mina dê.

Artigo 27º

Tudu nguê tê dirêtu di participá ni cultura di região dê, ni desenvolvimento científico e lucló cuê.

Tudu nguê tê dirêtu di proteçon di interesse moral e material di tudu tlabá científico, literório e artístico cuê fé.

Artigo 28º

Tudu nguê tê dirêtu di fé pa zisti, ni plano social cu ni plano internacional, ua modo di dirêtu e liberdade cu só ni Declaraçón sé, só cuá vedé.

Artigo 29º

Qualqué nguê tê obrigaçón ni glupu dê, e xi ê na sa ni glupu sé fa, ê na ca desenvolvê fa.

Óla qualqué nguê ca gozá dirêtu cu liberdade, selá ê cumpli lei pa plomovê lispêtu di dirêtu cu di liberdade d'ôtlo nguê, pa moral, lei di govenu e gozo geral ni democracia só cuá vedé.

Tudu dirêtu cu liberdade sé na ca pô zisti contla vonté di Naçón Unida.

Artigo 30º

Tudu cuá cu só ni Declaraçón sé na ca pô plimiti qualqué Estado, glupu ô nguê di fé qualqué cuá cu ca pô plijudicá tudu dirêtu cu liberdade cu só ni documento sé.